



Broj: 01-02-773-2/17  
Datum, 26.04.2017. godine

Shodno odredbama člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08) i člana 148. Poslovnika Gradskog vijeća Grada Sarajeva („Službene novine Kantona Sarajevo“, broj 28/09), na Trećoj sjednici Gradskog vijeća Grada Sarajeva, održanoj 26.04.2017. godine, **Predsjedavajući Gradskog vijeća Igor Gavrić kao gradski vijećnik** uputio je **inicijativu** vezano za davanje imena „Dolazna stanica Ramo Biber“ objektu gornje stanice „Trebevičke žičare“, a nakon okončanja izgradnje.

Gradsko vijeće je podržalo ovu inicijativu, te je ona postala **inicijativom Gradskog vijeća**.

U prilogu je inicijativa Predsjedavajućeg Gradskog vijeća Igora Gavrića kao gradskog vijećnika dostavljena u pismenoj formi.

*PREDSJEDAVAJUĆI GRADSKOG VIJEĆA*

*Dr. Igor Gavrić, s.r.*

Dostaviti:

- Gradonačelniku
- Evidenciji
- a/a



*Predsjedavajući Gradskog vijeća,  
u funkciji gradskog vijećnika*

*GRAD SARAJEVO  
GRADSKO VIJEĆE*

U skladu s članom 19. Poslovnika Gradskog vijeća, podnosi se Gradskom vijeću Grada Sarajeva Inicijativa sa zahtjevom da je Gradsko vijeće podrži i da postane inicijativom Gradskog vijeća i to kako slijedi.

## INICIJATIVA

Inicira se davanje imena „Dolazna stanica Ramo Biber“ objektu gornje stanice „Trebevičke žičare“ nakon okončanja izgradnje.

Grad Sarajevo trenutno implementira Projekt „Izgradnja nove Trebevičke žičare i pratećih objekata“ koji je od velikog komunalnog, privrednog i tursitičkog značaja za grad Sarajevo, a koji za Sarajlije ima i dodatnu sentimentalnu vrijednost, jer je sarajevska žičara svojevrsni simbol grada. Ratna i agresorska dejstva su u cijelosti devastirala „Trebevičku žičaru“ i njenu kompletnu infrastrukturu. Među prvim žrtvama krvave sarajevske apokalipse koja je počela u proljeće 1992. Godine, nalazi se ime nepravdno zaboravljenog Rame Bibera, radnika, tada Gradskog preduzeća „GRAS“, koji je 02.03.1992. godine mučki ubijen na radnom zadatku, dok je na gornjoj/dolaznoj stanici „Trebevičke žičare“ obavljao dužnost strojara i obezbjeđivao „Trebevičku žičaru“ i pazio na protivpožarnu zaštitu. U dostupnoj dokumentacijskoj građi o ratu u BiH i Sarajevu navodi se da je, tog kobnog dana, veća grupa nepoznatih naoružanih ljudi opkolila gornju stanicu žičare, a da su trojica od njih odmah pokušala ući u objekt tražeći od Rame Bibera i drugog strojara žičare Abdulaha Rizvanovića, da im objekt predaju i napuste ga. Uvidjevši da su opkoljeni i da im prijete opasnost po život, Ramo i Abdulah su skočili iz stanice i pojurili kroz šiblje i šumu, trasom žičare prema gradu. Za njima su vojnici rafalno zapucali i tada je Ramo Biber usmrćen hicem u leđa i stomak, a kasnije i pucnjem u sljepočnicu. Ramo je pronađen mrtav u blizini trećeg stuba „Trebevičke žičare“. Prema dostupnim saznanjima, za ovaj zločin i ubistvo Rame Bibera niko nije krivično odgovarao. Iza Rame Bibera ostala je supruga i sin. Ramo je ukopan na Gradskom groblju „Vlakovo“. Ramo Biber je danas zaboravljen i malo je poznato da je Ramo Biber bio jedna od prvih žrtava rata i ratnih dejstava u Sarajevu, da je bio uposlenik sarajevskog javnog gradskog preduzeća koje je upravljalo žičarom, da je mučki ubijen na radnom zadatku braneći sarajevsku žičaru i svoj grad. U Raminoj borbi i žrtvi ogleda se borba i žrtva i hiljade ostalih Sarajlija i djece, a davanjem imena objektu gornje stanice „Trebevičke žičare“, nakon okončanja izgradnje, odat će im se pošta na pravi način i bit će sačuvani od zaborava.

Predlaže se Gradskom vijeću da zaduži Gradonačelnika da, u cilju realizacije ove inicijative, poduzme sve potrebne radnje kako bi se nakon izgradnje objekta gornje stanice „Trebevičke žičare“, u okviru Projekta „Izgradnja nove Trebevičke žičare i pratećih objekata“, istoj dodijelilo ime „Dolazna stanica Ramo Biber“, a što uključuje i predlaganje odgovarajuće odluke Gradskom vijeću.

U prilogu je dokumentacija koja dodatno obrazlaže ovu inicijativu.

U Sarajevu, 14.04.2017. godine

*PREDSJEDAVALJUĆI GRADSKOG VIJEĆA*

*Igor dr. Gavrić*

